

四庫全書

集部

欽定四庫全書

集部

海壑吟稿卷二

詳校官檢討_臣劉 忻

侍讀_臣孫球覆勘

總校官編修_臣倉聖脉

校對官學正_臣翁樹棠

謄錄監生_臣王 宮

欽定四庫全書

集部六

海壑吟稿

別集類五

明

提要

臣等謹案海壑吟稿十一卷明趙完璧撰完璧字全卿號雲壑晚號海壑膠州人由歲貢生官至鞏昌府通判是集詩六卷文五卷王三錫序其詩集謂嘉靖間筮官司城抗直忤權奸與楊椒山公同厄按集中北司獄中七

言律二首序云嘉靖甲寅秋秋曹檄捕豪校
某因獲罪東湖翁劾執坐死賴元老科臺之
力僅復瓦全云云東湖者陸炳別號也時炳
為錦衣衛都督與嚴嵩表裏為奸其勢張甚
完璧以指揮未秩能與之抗其獄中與楊繼
盛倡和諸詩有辛苦不妨淹日月援書喜有
漢良臣等句繼盛死西市完璧作楊烈婦詞
以哀之有小雅怨悱之遺可謂志節之士其

詩多觸事起興吐屬天然絕無叫囂怒張之
態亦與有明末造矯激取名者有殊徒以名
位未高史不立傳遂幾於湮沒不彰僅賴此
集之存猶得畧見其始末亦足見正直之氣
有不得而銷蝕者矣乾隆四十六年九月恭
校上

總纂官臣紀昀臣陸錫熊臣孫士毅

總校官臣陸費墀

海壑吟稿序

海壑趙先生今年八十餘矣吟稿其平生所肆力且以自愉快者也蓋先生位不償才故以其未盡用之志寄之於詩久而成家積之成帙云先生之子為今大名守清廓君於余弟輔為寮長而與余姪坤同進士也則余於先生有世好之誼焉一日弟輔受是稿於清廓君既付之梓已又偕大名倅韓君等致書於余索余言以弁其端余取而閱之因得以見先生於詩詳先生之始末

則益嗟嘆歆慕之矣昔太史氏有云詩三百篇大抵聖賢發憤之所為作也迄至盛唐如李翰林杜工部二大家古今稱卓爾者亦皆意有所鬱結不得通其道耳先生幼負才氣謂功名可指取已而數不偶從歲薦就秩都下而先生業已著詩自娛無他愠居無何績效懋著聲籍籍於縉紳間人謂先生脫穎之才已試囊中矣然先生一意危行不為姘何媚世竟以被中逮繫方其時人皆為先生震怖顧先生特屹不為動適椒山楊公同

時在獄與之吟咏酬答以道義相得甚驩於利害之臨
泊如也故余讀是集中至獨知心上原無累與授書喜
有漢良臣之句則輒變色動容亟服之焉最後謝天水
之郡判以歸世方彈指咄咤以未能究先生之用為惜
而先生內沾沾自喜以長有天地之日而竟其適於詩
為幸蓋自其立朝時已嘗自命云何時謝朝組隨意踏
莓苔由是以觀則先生者尤泥塗軒冕浮游塵埃之外
古之所謂達者也先生既歸徜徉林壑觸趣成聲或幽

踪雅致廣蕭散之懷或精裁婉托寓無聊之感憫時迫
志談理訓真則脩然方之內舍和茹泊悟玄超凡則悠
然方之外其所咨嗟咏嘆即時或自鳴其鬱結不平而
絕不為叫噪怒張以恣其臆蓋先生之發憤於詩垂數
十年而不為儻來之物以滑其內而奪其功故振之以
雄麗而出之以優游卓絕一時有如斯者語曰用志不
分乃凝於神豈謂是與假令先生以其直節壯猷托景
青雲係籍華旌表樹品廊之上馳騫萬里之途其勲烈

可勝道哉迺其所歷宦踪僅僅止此遂卷之於泉石巖谷之間非其當矣然先生志不鬱道不窮其發為詩章必不能自力以致必傳於世如今雖使先生究所施舊勲烈於一時吾不知先生肯以此易彼否也雖然吾又聞先生年已逾耄而神猶屹屹不衰其文思不少減於壯歲矧今太守君抱猷宏峻且偉然有公輔之望由茲以往先生之未艾者年未已者詩而未可量者後人之勲業也則先生於不朽之事可謂兼之矣余復讀先生

詩至鹿下伊臯之語歷古詩家詎能有之乎嗟嗟先生
固足以自愉快矣哉濟郡見峰王之垣頓首拜撰

欽定四庫全書

海壑吟稿卷一

明 趙完璧 撰

五言古詩

感興

淳風不可挽
大道成微茫
椒蘭不自保
惡擬以充囊
自愛瓊珮姿
期以揚清芳
美人改中路
徒此明月光

聞慎修兩臺交薦

顧我寡昧子庸庸何所長祇有一寸心可以昭夜光藏
息良有由持贈美人傍念此塞修理愛惜以崇芳

籠鳥歎

山鳥胡不幸罹此樊籠中啄不獲野田栖不及深叢梳
翎背旭日垂翅當寒風徒抱曠逸懷側目雲霄鴻祇緣
笙簧音乃滯幽囚窮嗟嗟耳目娛盍以物我通

冬夜書懷

新月銜寒山北風下簷楹羈人夜秉燭孤坐遠含情渺

渺海山曲依依鳳凰城祿薄十口饑官卑一身輕印綬
鉗鐵堅風塵魂夢驚枳棘忍自栖鹽車向誰鳴舞劍尚
餘輝彈琴不成聲賴有杯中物嘯歌仰太清

月林遺酒西臺感賦

故人遺我酒我悲故人心故人不可見使我愁思深畫
地誰能違刻木威難禁烟霜夜淒淒鴻鴈秋沈沈衣葛
當北風餐荼絕衷腸怨艾去禍胎今古歸福堂把酒且
自飲淋洗鬱冤傷嗟嗟同心人翦燭今何方

冬夜感懷

高齋夜獨坐寂寂銀蟾生疎簷素影下閒堦秋水明冷
光侵我體清輝怡我情獨酌不成醉幽吟無與賡坐久
靜不寐松風落寒聲悠悠東山下歲晚沈高名拔劍自
撫拭咄咄空悲驚

飲馬長城窟行

飲馬長城窟馬渴飲不已馬飲良易足我懷當何止疇
昔離故鄉淹淫幾萬里明月缺復圓邊聲日充耳精魂

遶天涯日夜邈伊邇仰天不可呼歸鴻背我起燕然勒
幾時大刀難自揆一身寄他人未保生與死橫顚斷腸
淚墮落長城水長城水不竭離情不終歇

棄婦辭

棄婦出蘭房長辭薄倖郎憶昔授綏日合卺雙鴛鴦相
為琴瑟歡宜室期餘光自君蕩春心嬖愛章臺倡冶容
盲爾明荆布成惡裳嬌歌褫爾魄沈默非巢簣銷神復
索家顧謂邇迨良劬勞敬克室反目卒為殃子為邪孽

迷妾為君子傷賤妾不足惜古道孤肝腸淚出身亦出
請試倡短長

代鶴言

山人遺鶴蓄久而馴擾彌甚家人數焉羈諸
桺無令縱恣嘖嘖晨暮不休余聞而歎乃代
言

元化洩靈淑產此神異姿皓潔煥水彩不雜塵埃緇啄
慊四海雲九霄惟所之忘機天壤間何意虞羅欺鍛我

紫氛羽劇我青田思垂翅難驚羣矯首燕雀嗤良玉汚
塗泥仙格奴隸司昔為青雲器今為糞壤遺鬱鬱寥廓
抱依依知者誰開此含丹晴迹滯無異窺胡為作近翫
養翮以前期

靜寧曉發

曉出靜寧郭山川鬱蒼蒼初日韜玄霞淒風下崇岡鉛
花肅寒色嵐氣昏朝光山木涵烟古雲泉漱石涼我車
亦何之高誼圖忠良日短不遑食暮夜成倉皇空谷越

營魂冷候嗟薄裳遙途力應躋修坂馬玄黃鴻鴈聲嗷
嗷望之思渺茫飄颻迴不見橫涕知幾行

漁父詞

世道久交喪人心不如水蕭然一釣舟滄波吾老矣棹
去鏡中天歸來蘆葉裏魚鳥作比隣風月還知己江山
萬古情烟雨平生喜雲靜捲釣絲得失何心爾雪中無
羊裘日長迴獵士坐看驚濤帆戒險知誰是而無名利
懷禍患胡罹此買得孤村醪醉中冥甲子悠然快一眠

化契青叢底覺後作長吟橫竹雜流徵浩然天地間無
復逾樂只誰能質姓名鼓枻不相俟

樵父詞

太古不可挽空山潛幽人世務無繫縛樵蘇不為辛游
日曠烟靄騁懷極嶙峋咄惜聳壑材聊斧臃腫新空翠
冷入骨殘霞每在身谿谷適足然鹿豕夙所親朗唱振
林木長嘯超風塵寓興雲與石逃名秋復春巢由慕狂
蹤堯舜非所欽豈云負叔敖含笑棄買臣此中有真趣

物外曾憂貧丹崖一千丈不願圖麒麟夕陽二三束重
負嗤丘民頽然卧明月身外安足論

七言古詩

古道傍

古道傍雙垂楊長風颯颯聲欲狂行人已去寂渺茫黃
塵一陣空斷腸

禽言

水兒者小水鳥也天將雨飛鳴曰水兒水兒

俗為雨占鹽城久雨為災猶聞此快快以賦
水兒水兒穿雲呼雨今何之連天秋水苗已稀汝慰何
多民何其

寒食吟

芳春苦局朱戶疎簾幾點寂寥雨醇酒何能刷我懷朗
吟豈盡幽情吐平湖春草綠如烟安得杖藜緩步桃花
阡

春夜曲

烏夜啼月欲西沈沈院落春雲低玉漏無聲夜將半金盤有酒人欲迷桃花扇底苦夜短千金一刻催隣雞

淮村八景

為安丘黃甥作

淮川晚渡

淮水浩以廣滔滔下滄溟長風吹落日烟雨時冥冥行人欲渡不可行灘頭且莫相喧爭方舟自有濟川術不比無人盡日橫

朱寺曉鐘

山僧睡欲足，攜鯨戲蒲牢。
疎星帶殘月，殷殷來曙號。
驚風吹落仙臺高，雲際裊裊回林臯。
大千種種塵夢勞，虛空一破無秋毫。

浯水澄清

齋泣何清澂，上徹太虛明。
纖雲不敢翳，萬古誰能并。
惟有孤貞契，心骨波瀾不為生。
倏忽如何獨漉水，中泥水深月暗行人沒。

蓋峯聳翠

欽崙不可仰縹渺通天衢翠色照終古正氣永不渝斜
陽斷靄濃未釋過雨晴嵐藹欲滴對爾亭亭一正色仿
爾巍巍千仞壁

書帶餘香

斷簡那可覲秀帶留餘芳乾坤假私息雨露滋春長王
孫一去不復返牛羊歸來日應滿野火空將化劫灰斯
文根蒂終難斷

囊沙報雨

夙仰淮陰名不識淮陰陳囊沙今尚存報雨無從信蟲
沙之化自可猜千秋殺氣神與偕多多益辦真雄才軍
聲十萬風雨來

搭嶺連雲

碧嶺何崔巍行雲日縈迴相看不相厭怡爾重徘徊衣
裳炫爛資爾補蛟龍早晚憑爾雨秋風吹動桂花香跨
騰直抵清虛府

松池印月

皎皎松上月湛湛松下池水月本無意相逢如有期微
波不興擬鏡淨一片琉璃迴相映靈機悟取真境中萬
海千江同一性

海屋添籌二首壽尹金峯侍御太翁

涼飈西下吹洪濤秋空怒捲雲山高紫霞綠霧從遊遨
金銀臺畔追仙曹醉指三山看海屋此中籌筭原於穆
瀛海仙來九天手挽白鹿秋風前童顏鶴髮不知年五
雲竒觀欣何緣滄溟會見歸神籌相尋今古良有由籌

同運人同休天同久地同悠

夏日小莊即景

細柳孤村白日長柴門流水芰荷香
幽軒獨撫翠岩光
閒庭芳草晴烟薄南薰細細餘花落
虞絃靜抱憑誰作
夢回修竹聽啼鶯百鳥叢中轉玉笙
如何迴不近蓬瀛
八龍濟美行贈劉春臺太守

丈夫合作人中龍生子擬與荀氏同
荀龍之名不可核
轉看八子迎春翁翠濤紅雨奮頭角
江門霹靂幹春工

八荒鴻潤暢枯槁九天一息祛氛霧姬周達駟直蠅蚋
高辛才子俱蠛蠓老龍種種赤帝宗要亦海若瑞錫乎
天東

楊烈婦辭

楊子椒山因同難西臺相知乙卯冬被刑避時禁託烈婦辭以傷之

楊烈婦情可傷生平雅操冰與霜小姑作逆誠無良衆
人默默將誰匡直言為姑陳丹心照中堂不惜一人生
大義或可揚何意觸姑怒青蠅白壁反無光抱我寸心
曲終始誰能詳死以天下事辱為小姑償彼蒼不墮淚

萬古摧肝腸

西山行

西山行苦難去去愁無端盤盤朝還暮登頓凋朱顏孤
雲巉巖不可攀羊腸詰曲天漫漫車輪摧盡馬蹄缺顏
年病骨傷心酸風霾暗黃日妖鳥哀林巒豺虎晝縱橫
行人恣饑食艱哉此行良可嘆拊膺摧折心與肝滄溟
何在生羽翰白雲石上垂綸竿

春溪行送鹽城蘇二尹擢判壽州

金匱要略卷一
春溪柳黃君祖行烟開錦浪桃花明瓊軒釀凸暖風軟
綵舟望絕仙雲程芳聲楚天濶斜日滄波悠孺子鉅宓
絃寵駕遙西州曠此山水音乖彼蘭蕙傳青陽無定所
碧樹生涼秋短髮蕭蕭春欲歇故鄉未去故人別送君
天衢努力答明王蓬山迤邐餘休烈

懶起

懶起懶起六十餘齡閒懶已癖布被昏明僅庇身竹窻
風雨無侵耳農耕不思商利莫齒紛華冰炭權執力已矣

山海悠悠春復秋
風花擾擾從人喜
醒復成眠覺曾開
視輾轉無期非午
辰已枕畔安眠蓬
島仙不知牀外有
書琴在裏香煖從
容一欠伸笑他橫
足帝腹何心爾爾

鹽城獲雙鶴

淮南偶得雙仙禽
野人慰我高雲心
昔閱滄涯彷彿盡
凡格適爾華亭清
絕誇靈音雪衣六
月開煩襟霞顛一
夕來遙岑昂昂烟
華猶在翮皎皎塵
點胡相侵天風吹
酖顏海月鳴瓊琴
爾志九霄遠我懷
千古深世無知已

沈幽潯日斜逢君猶斷金
萬里終當作遐舉徘徊暫爾
狎青林

清宵篇送孫小渠

故人子荆何處來
清宵紅燭心眼開
燕山一別二十載
停雲望斷空徘徊
淮南小邑桃李香
青藜白髮從翱翔
春來幾日風雨狂
閒庭岑寂古蘚蒼
錦帆一夕飛滄江
相持夢寐驚華堂
話來往事歡復傷
人生離合參與商
顧我幾多殘歲月
君行咫尺登雲闕
神虬靈鳳又何期

清漏玉杯君莫歇

已丑開都城有妬妻斫其妾之雙足者妻就刑
夫逋焉感而賦

青娥倏隕雙秋蓮玉魂悽斷千里緣纖弓射反伏未覩
凌波履險知誰憐入室之妬莫可測他人所慕吾所捐
前魚淚落後魚船飛燕褫魄班姬妍天涯弱質胡相及
仇讐乃在香塵邊翦忌不遑圖掩鼻甘心共棄滄浪天
昔以要寵今殺身膏蘭自取焚與煎薄命速辜閨室延

一朝三褫尤物慙猩猩之履猶在前

晚春西原

衰翁三月不出城春深早已過清明西原偶爾踏芳草
且幸春光猶未老桃花半笑如有情新柳垂青度妖鳥
溪聲送客去潺潺村落迎人來渺渺步入翠紅徑松烟
逸高興墮紫惜年華綠陰怡日靜嗟我塵埃人幽境罕
相並不如野鴉明月巢林隈空憐海鶴來往啄蒼苔喜
來悲晚從徘徊斜日寒山又欲頽

曉帆歌送溫玉齋

玉翁張帆凌曉風飄飄飛向魯王宮涼雲淒雨不忍別
把觴挹袂嗟相逢人生落葉全無據我胡來斯君胡去
天涯渺渺無前期若更相逢是何處和風煦我春無涯
朗月依人秋正華錯刀欲報媿瓊玖明珠割分懷遠遐
汀草萋萋湖水綠烟波斷送人如玉丹萼十里如有情
君胡不醉陽關曲碧山斜日餘幾多夢魂失道如君何
紅顏擬有青眼時白髮惟看鴻鴈過

代黿山王西亭大尹送周古栢先生擢教天城

鎮邊

欽峯牢落滄溟東絳綃青眼濂溪翁雲飛巫臺碾寒魄
雨餘金谷流清風瑤草珠簾曉涵翠夭桃瓊圃春搖紅
圖丹繪碧耿交誼青燈細雨調絲桐芝蘭充庭舊食德
琬琰懿質今誰礪青鸞寵錫塞垣迴白首悵慕蓬瀛空
鄒魯文旌達荒裔奎壁瑞采流琕弓風樹銷魂苦蕭颯
烟山送目悽冥濛金石荒亭一動色萍蹤何處重相逢

碧峯落日夢初斷
青天杳杳涼秋鴻

雙節辭

密人有兄弟相繼而亡者其姒娣各尋死之
鄉人義而表雙節焉余因感賦

山雲野水春漫漫我欲弔此雙節空含酸
淳風死去不可挽聲華千載顏狂瀾烈哉二淑女
冰雪凜腸肝誰令
逋沈鴈各惜孤鳴鸞
痛絕異時殞淚盡
同日歡貞心逐
幽渺落葢隨風湍
金石何期抱一節
淵泉偶爾尋相安

春草空留翠羅綺秋風零落金琅玕紛華濁俗猥瑣觀
珠聯青海星斗寒君不見鬚眉丈夫盡楚楚胡為偷生
反面視此曾無難

南極歌癸酉壽辰

時年七十四也

南極秋轉青雲岑西風早下靈璈音飄飄老鶴過溟海
滄州縹渺遙相尋獨上金銀臺祥烟四望開天空日月
老海岳心悠哉瑤觴曉吸霞入口玉筇晚拖龍在手偕
老金堂古亦稀重頌紫誥今何有蘭桂兒孫赫鳳儀樓

臺簫鼓驚鼉吼未須更問綵雲人如何不醉華筵酒大
兒武庫超擢頻小兒文場聲價新燕山濟水亦千里方
寸喜來青眼真唐虞化日樂不禁蓬瀛玄筭要千春祇
恐無述底衰老天恩帝力空懷抱芳庭儘熱鷓鴣班後
昌圖報精裡禱

鹽城送姪懷慎遊杭州

壯夫慷慨吳楚遊飛虹浩氣湖天浮我欲從之滯衰骨
風流美事輸先籌束書腰劒觴高樓北風日夜吹蘭舟

片帆望迷殘雪浦孤鴻聲斷滄烟洲寒梅三弄出淮水
黃鶴一跨輕揚州得魚沽酒風月濶閒雲遠水情思悠
丈夫宏圖豈鹿豕乾坤勝概開雄眸雪濤澎湃江千里
芙蓉秀削峯巒起海頭怒激子胥潮橋邊苔老黃公履
江山人物盡繁華黃金紫玉何足誇收來圖畫寸心曲
賦擬班張五色葩剡溪盡興一返艇錦城雖樂終還家
椒盤遲爾起頌花華燈焰焰醺紫霞春宵客夢驚天涯
懸河慰我卧遊賒

行路難懷慎姪自鹽邑將浙遊不狎乘舟眩暈
病歸戲作

吳山迢迢幾千里北人不狎南中水孤舟一葉浪吞天
風帆激雪雲中起殘魂零落波心裏洄流俯瞰頭目旋
山移岸轉何時已昏然混沌之九天頽然沈迷於九淵
仲子哇出心與肝莊舄長吟夜不眠甘息風塵機慰我
方寸地履險不如夷未必江湖利石尤風急棹空回興
盡何須苦復催三日淹淫一日來盧醫一笑非其災孤

城半夜驚魚鑰嚴牙燈火吹殘角昨日遠遊今日歸偶
爾沈痾倏爾豁古來聲利山水間鑿空萬里將何堪豈
圖坎壈還平湍舉足世路俱間關行路難良可歎

顏室歎并序

嘉靖丙辰秋余擢判鞏昌攜慎修兒以行過
寓濟陽官署適風雨連朝次夜分乃已輾轉
不能寐芒刺隱然凡一再起如或翼之移裝
間亦莫知所謂俄而所寢之一楹遂塌幾致

覆壓而幸免也亦神矣哉時維七月之二十
有七日也悵悵以行是為歎

倥傯七月來濟陽隴西遙駕秋山長狂風吹雨行不得
瀟瀟二日雲茫茫中宵乍歇天兵休奔泉汨汨庭際流
郵亭寥落少人遊我胡偶寄令嗟愁呼僮秉燭滅復明
一夕再起莫我由束裝三鼓為誰速歛然頽室非人謀
飛我天涯魂顧我仙桂子一榻粉塵泥二命驚且喜始
以宦走榮詎知患且并幾為立巖人幸免刑谷生揮淚

忽盈把微名灰且輕樵雲釣滄水安知此阨傾人生脩
短良自命神禹風波終亦慶白頭老我豈摧殘青春騰
踏知何竟尼父從天亦泰然豪雄不變山隴前壯懷落
落胡相牽前途有酒還如泉

送陳肖玉長教擢教楚藩

胡為孤竒姿覲此青海曲玄簡如有情網常僻邑鵠朱
絲返淳元絲筆振頽俗霽霖膏幽蘭剖劂試良玉炫日
天桃崇紫霞凌風瑤笋超貞華楚淮絃誦春無涯龍門

蟾窟文澤餘歛有紫泥書仰翥丹霄鳳瀟湘杳靈翰琬
琰破塵夢悵惘湖水春索寞山陽弄挹之不可留瀕溪
薄相送青青楊柳搖碧波孤帆萬里情如何醪醑一酌
強君酡青萍三尺為君磨江空歲晚目力短霜寒秋老
鴈無多荒城銀燭坐風雨春暉紫府迷笙歌陳琳負偉
才仲舒抱俊策銀紀湘東豪仙集淮南客梁園授簡空
陳編巫臺夢思俱雲烟風流儒雅懷千年壯圖此日輝
前賢

題張平山古山春色圖

張生雅抱奈爾塵世何走筆驅此一段太古之嵯峨闢
開天地不可紀杳絕人寰知幾多青壁嶄巖以直上幽
谷窈窕而莫窺雲澹澹兮空寂氣蒼蒼而陸離隱乎清
颼淅瀝於窮壑藹兮幽芬逸泛於危巖林莽淒曠悄乎
無人一鳥不鳴暗泉磷磷苔老麋鹿跡烟涵草樹春巢
由秘高蹤車馬違驚塵中有金仙之寶刹浮圖隱隱重
霄拔高僧姓字不可聞鐘磬沈沈隔斷雲閒情獨撫悲

氤氲一生腸斷在人羣我忖張子懷景中情亦偕龍鍾
老夷門霞想終難諧聊復快寫幽曠心使我亦得展慰
揮千金

題張平山溟海曦陽圖

訝此尺素中滄波擬萬頃是誰為此圖蕩漾元無定此
非摹我東溟無際之洪濤胡為一輪初日停朱影三山
巔在何處長烟野霧茫茫去金光煥射紫霞飛晴飈歛
掃青天曙不聞天雞鳴無復魚龍驚但見火輪簸蕩下

不可測潮頭絳雪如山傾烟波迴撼赤城明扶桑灼爍
金鴉輕一鳥飛百鳥歸一水耀萬水輝幽荒寒門開夕
霏長江大河相依稀虞淵終古不相值妙造精光隨手
揮張公圖山復圖水卷首疇昔如豫此晚年別號偶相
符海漸薄劣山維爾君負大造資我非補造才巍巍君
名何可摧滄波猶笑能塵埃

憶作畫時張號茅溪予號雲壑別來六十餘年
間張更平山予更海壑當時卷首二圖殆彷彿
後來之二號若豫為
之者故末見其意云

湯即墨太翁南還過膠墨人追送之

華軒忽遽膠水東三子速我玉鉢詩無工仙翁夙仰天
上客絲毫漫爾隨春風一枝仙桂來墨陽相從懿訓稱
龔黃滄海枯萊被時雨華胥仙夢交扶桑興高引旆下
蓬闕春帆縹渺吳山月恩霑有自可能忘挽轡空教心
力竭柳依依雨霏霏桃花亂點春衫稀子規啼歇暮山
紫清樽酒盡滄雲歸望君擬南極雪顛方瞳瑞王國待
君遊東瀛玉笙瓊珮飛天聲勞峯鳴鳳一時舉朱衣鷹

繡黃鶴輕山高而海清澤濺而永名赤子慕不輟青桂
當重榮丹霄有道在平地皇靈厥艾還分明顧我迂踈
老林水烟絲雲斧何如情長短有句長短亭聊爾為墨
人之誠遠人之征

次韻元遺山送李叅軍赴塞上

嘗讀遺山寨上篇悲愁慘憤極邊塞之苦詞
亦工矣但丈夫之氣何太靡耶想當時于叅
軍必有為而發也余非敢以文詞相雄長特

欲反其意以壯之耳

慷慨出門去擊楫渡桑乾丈夫處世非鹿豕關山談笑
驅漫漫不策絕世勲虛生天壤間義氣摩青雲肯教別
淚潛惜哉折坂王孝子奉身廢義迴間關更有吳江竊
一隅偷安忍耻忘寄環要知西域奇功照青史要知燕
然偉績垂毫端岐路情懷總兒女風雲六翮乘時搏身
歸斧鉞命祿遺椿萱盤一朝樹功名家國同慶懽便教
風雷烈烈肅沙漠直須名王授首霜刃赭花斑衝風單

于庭踏雪賀蘭山孤臣夙中熱不知鐵衣單王靈振無
極何恤凋朱顏雄飛本自猛將志丘園徒老冥與頑君
不見陶太守時憂過爾耽優閒移魔寄深意揚名合自
甘辛酸一杯萬里與君訣無前戎捷期君還

春風篇

春深暮夜春風號滄溟吹轉涼月高脩篁歷亂不成影
長松滾滾翻江濤斷雲流空光慘慘歸鴻失侶聲嗷嗷
迢遞琅璫下綺閣破窻耿坐燒蘭膏臺城柳條今又碧

金谷花枝向誰赤一番草綠長楊基千載春光樂遊陌
西陵無復望銅臺北邨一夜摧松柏春來春去奈人何
古人今人春幾多歎息風前一杯酒亦曾笑把昔人手
今古情懷不相值祇合冥會浮生意翩翩白馬金鞍光
晴川渺渺桃李香東山華容莫相棄蘭陵美醞何可量
梨花皜夜夜不寐秦箏金鴈飛高堂春風日日吹我袂
春酒時時淋我觴但於芳春羨風物不向春風空斷腸
吹頰瓊岳了不覺落來烏帽從數數百年幻夢瞬息爾

莫令來者悲齷齪吁嗟太昊封姨兮難久依亦能布春
兮送春歸今日清樽惜沈醉明日蒼苔紅雪飛

海壑吟稿卷一

欽定四庫全書

海壑吟稿卷二

明 趙完璧 撰

五言律詩

昌平道中

濛濛寒食雨翦翦暮春風
醉眼開新綠征衣點落紅
山光憐靄靄王事苦匆匆
空復尋芳意淒其望海東

安寧寨曉發

微雨曉初霽揚帆亦快哉輕風疎柳下晴景斷崖開簾
影青山過潮聲雪浪迴憑虛來浩渺頓覺出煩埃

德州

畫舫來天上黃昏泊德州滄波千里迴殘月片帆收吾
境欣初入他鄉嘆遠遊雲山開曉色早晚步瀛洲

阻雨安寧寨

小雨阻孤村千山雲霧昏方舟繫枯柳落日傍柴門颿
颿蕪葭冷悠悠蟋蟀頻疎燈照秋夜歌枕自驚魂

癸酉新秋二首

玄運不自已，清秋暗迫來。
金風軋煩暑，爽氣溢樓臺。
世事全如夢，韶華半不回。
餘光更幾許，相賞莫相猜。

又

幽賞莫相猜，蟬聲故復催。
煩襟涼似洗，塵慮暗須裁。
月轉高天朗，花隨淡日開。
清風樽酒在，千古幾人回。

再賦新秋

清曉一登樓，新涼報早秋。
風輕梧葉響，露重竹光流。
山

意淡青眼波澄瑩白頭老懷憐暮景瀟灑作閒遊

冬日靖虜曉發

初冬發靖虜殘雪照山頭冽氣凝青嶂寒光迫翠裘孤
臣愁絕塞萬里望中州擾擾無東計悽悽欲歲遒

寄黃海野天曹郎謫歸

不見黃生久塵襟耿未忘玉堂周禮樂綵筆漢文章碧
樹虛秋思黃花負晚香擬為滄海慰不久滯懷王

登閱江亭

亭在鎮江江南岸簡閱舟師者

獨上江亭望長江，豁壯眸，風帆隨霧捲，雪浪拍空浮。
天塹中原迴，王靈百世悠。酒酣千里客，聊爾一優游。

新中驛夜雨

卽次昏黃雨，瀟瀟夜未停。孤燈燒欲暗，宿酒醉初醒。
輾轉那能寐，淋淫不忍聽。何如飛夢去，遶我故山亭。

房山道中

曉日房山道，行看亦自幽。空山鳴野鶴，小水立閒鷗。
斷靄迷村樹，晴雲結海樓。東風吹款段，倦客重回頭。

送范惠泉地曹南守許關

都城作

別送滄江渺憐分青海情
楚天春草合吳水暮烟平
蘿月清無寐絲桐秘不聲
關山勞望迴報績計仙程

都城西望湖亭

雲外下長坂湖南過小亭
寒泉冷石竇細草暗沙汀
駭鷺開青靄遊魚破翠萍
釣磯來暫息波影俗懷醒

縱舟張家灣

早解雲邊纜初歸海上賓
雙鳬衝翠靄孤鶴出紅塵
回

首燕臺月離情漢苑春雨昏留別浦沽酒暫相斟

晚泊長蘆

晚泊長蘆月涼生瀛海風雲川淒暮笛岸葦泣寒蛩酒
盡空明裏詩成欸乃中天涯浮桂棹星畔老槎翁

月夜飲靜寧劉陵沙太守

涼月飛寒巘清宵遇故人共將遼海思相慰塞垣春把
酒黃塵倦論文清興新挑燈放襟抱海內為誰真

贈許空石解元刺史貴南

荆識今何幸萍蹤亦可憐
聲光齊魯外俊逸漢唐前
塞日孤城暮蠻烟萬里天
何當一朝寵相慰五雲邊

廣濟寺

迢遞驅山逕倥偬入梵宮
長廊喧燕雀古殿鬱杉松
採藥神僧去霏香禪榻空
清魂欲延佇俗役未從容

寄丘月林給事

曠望天低樹孤吟月滿林
斷雲春寂寂落日晚沈沈
青瑣欽懷玉滄溟擬斷金
封書將別恨迢遞過西岑

月林見枉逢踐琴約西還賦送

故人歡有隕永夜問何其醕飲酬良覲調絲慰夙期霜
寒紅蠟短水冷玉龍遲竹裏清風起連牀無寐時

晚行溪畔

翠蓋斜陽外雕輿綠水邊清風吹細葛微雨散逢天沙
鳥盟何在溪魚樂自牽好來垂釣處只是近人烟

初秋暑退晚坐

蟋蟀鳴階下涼風動檻前露華侵袂濕月魄綴簷翩酷

暑知何去清宵自不眠幽吟對修竹相與鬪嬾娟

對雪限韻

錯落明垂地岑寥冷閉關寒庭花滿樹青海玉連山作
賦才難企高眠迹可攀懷人清興發孤棹夜中還

夏夜獨坐

獨坐芳庭晚遙依銀浦清竹風披溽暑山月靜荒城有
酒閒仍醉無官負自輕年年滄海上高興此平生

雨中

冥雨朝還暮淒風夏作秋竹光聯榻潤苔色上衣浮古
木驚濤轉飛覺瀑布流清軒人獨倚盡日看浮漚

官衙夜雨

清館鳴寒雨離人寄遠天高風歲欲暮孤燭夜如年妻
病沈雙鯉兒官苦獨賢羈愁千里外魚目五更前

鹽城聞促織

忽聞鳴促織應自感清秋花底來何暮風前聽未休異
鄉人不寐故里思難酬骨肉經年別湖天回白頭

八月四日官署晚坐

海邑消煩暑星河坐晚涼清風來獨樹新月掛危牆水
氣生寒早蛩聲向夜忙客懷秋漸老官邸漏初長

鹽城八月十五夜二首

飛鏡當庭靜銜杯向夜深清光霜滿地寒色水侵襟不
覺銀河落偏宜玉漏沈暫將江國景聊慰海瀛心
八月鹽城客孤吟桂魄秋閒時常惜老對月欲銷愁把
酒添清興酣歌慰白頭郎官今不數猶慙此同遊

淮陰冬夜

羈客當寒夜驚魂自不眠
風簾清寂寂霜月冷娟娟
衰鬢淮陰道歸心歲暮天
敝裘擁獨坐譙鼓暗雲川

弔黃海野早發

殘月策行驂青娥戒曉嚴
征衣鳴落葉宿鴈起寒湍
烟迴蒼茫外曦明紫翠間
北風吹老淚悽惻度林巒

歸宿柴溝

餘映沈岡疾悲風捲地寒
烟中度淮水月下扣柴關
半

醉霜猶冷孤眠燈欲殘可憐今夜夢腸斷野雲間

十二月立春日簡樂侍御二首

臘日逢春日新年入舊年野梅殘雪後江鴈暖風前老
眼園林霧閒身湖海天朱顏那可再偷向醉中還

鼓角春初報陽和物自私冰溪漸欲綠岸柳媚將絲雲
壑堪乘興霜臺好賦詩相知無異地相賞莫相違

秋日出西直門

秋日遊晴曠西風被面涼征袍紅葉滿羸馬白沙長曲

水驚聞鷺荒池度野芳碧峯千萬點一望慰愁腸

秋日興教寺

古寺青林外輕車白日斜秋懷開野色午茗愜僧家
山鳥清吟興雲松靜物譁禪關醒俗夢坐晚意猶賒

都城送樂岱滄進士尹溧水

相逢忽復別羈客不勝情衰柳高秋晚寒山淡日明
歌殘春酒盡帆遠暮潮生何慰潘郎夢芳聲達鳳城

都城冬日公出同楊東川寅丈宿僧舍二首

冬夜宿僧房萍蹤覲帝鄉松風韻騷屑窓月照蒼涼不
寐清宵短論文雅誼長誰憐沈伯起相與慰壺觴
僧寺清無極羈臣愁未涯月明寒吠犬風靜夜啼鴉心
苦仍依國魂飛不到家悲歌逢義士彈鋏和京華

朝回望西山

初日早朝回金天秀色開綵雲連巘嶸翠靄接城隈幽
遠牽高興奔趨笑俗埃何時謝朝組隨意踏莓苔

獄中不寐

身老名何在歲殘人未歸
烏紗成晚崇白髮悟前非
十口知誰託千山隔鴈飛
淚痕揮不盡暮雨北風微

落日

落日崦嵫外新蟾粉蝶邊
嚴扉栖暮靄悲角調霜天
倦點燈前易徐調膝上絃
酒醒無限恨頭白梵鐘前

代送人二尹聞喜

闌暑金風早離觴野館西
關河秋杳杳雲雨晚淒淒
良吏新承寵殊方久望霓
即看今日業擬與古人齊

次韻山行即事

白雲幽石古青壁，瀑湍鳴空翠侵衣。
濕山花照眼明啼鶯，寒谷靜落絮晚風輕。
何處彌征蓋，松門一慰情。

次韻宿弘恩寺

殘陽投古寺，乘月訪高僧。
佛土風塵淨，禪心池水明。
玄關欣妙悟，白首絆浮名。
半榻三生幸，千緣一芥輕。

東歸過鄒平山下

昔去冰霜歲，今歸五六年。
青山如舊約，赤日自堪憐。
雨

鬢空成雪孤忠負所天偷閒過海畔故舊半蕭然

硤石

昔聞硤石嶮此日度應難烟洞深無極雲梯不可干
人從天上落樹向井中看空翠茫茫裏征衣暗浥寒

張茅道中

世路應愁絕胡為來此哉嶮巖崖畔度窈窕壑中回
仰面青天小低頭黃霧來艱危向衰老不覺此心灰

郭城驛道中

塞鴈驚斜日邊沙捲北風敝輿山霧裏冷飯驛亭中黃
草連雲暗青巒帶雪叢壯懷元不老猶慕伏波翁

塞垣曉行

野寺疎鐘盡寒山殘月斜冰溪驚鴈陣石徑破霜花杯
酒全無力邊風不可遮孤臣一萬里腸斷塞垣笳

次韻夜過六盤山

初月上銀盤登高夜倍寒谷風肌粟慄山露鬢珠團身
為微名苦心應老病酸秦程良不易蜀道浪驚難

次韻夜過分水嶺

素娥迎暮嶺青女伴寒空
龍劍明搖雪貂褕薄透風
征車長入夜王事久忘躬
穩羨山翁睡獨慚西復東

靜寧道中用韻寄凌沙太守

霜氣曉仍肅烟花迴未銷
龍冰千尺遶烏景一鎗高
同氣青天遠孤征紫塞遙
行行不自已翻恨我車膏

舟中夜雨

細雨江風晚蕭條落小舟
一身千里外百慮五更頭
水

遶還鄉夢雲凝去國愁沈沈不知曉一鴈叫寒洲

聞蛩

疎簾玉露冷深院候蛩鳴切切寒如訴悠悠夜幾更半
窻山月白一榻竹風清秋色竟何意愁人自有情

楊花

點點過樓臺因風何處來庭空雪歷亂簾靜日徘徊漢
苑春仍老吳宮寂可哀飄飄度江水腸斷幾時回

春日西疇

春日踏西疇東風陽焰浮暖雲屯隴畔活水浸溪頭百
畝周王業一犁莘野謀此身同鹿豕此樂豈人侔

次韻除夕

燈前辭臘盡漏底易年華撥火圍青夜傾醪泛紫霞清
香流栢葉懿頌起椒花學道侵衰暮經年愧聚沙

彈琴

彈琴有佳音對竹彈且吟清風來几席俗慮滌胸襟青
峯對終日綠酒沽千金太古慕高調冥冥獨此心

春日過涼臺寺

野寺風塵靜，乘春一暫遊。
叅禪違俗世，駐履傍林丘。
貝葉僧窻寂，金沙聖跡留。
慇懃訪學地，隨意却聞愁。

碧溝戰場

微雨曉初歇，陰烟過戰場。
悲風翻野蔓，流水咽荒塘。
枯骨生新蘚，殘魂斷故鄉。
誰輸全勝策，干舞念虞皇。

月下聞鐘

鴉影風前定，鐘聲月下聞。
高僧閒暮靄，古寺隔河濱。
冷

度千門雪清分雙樹雲夙懷超靜土終愧戀塵氛

茨菰花

忽訝秋風玉由來冰雪姿孤光明綠葦獨秀出污池寵
謝華堂翦閒依野釣絲清芬烟水外不受一塵欺

送姜省吾少叅駐撫商州

人去三秦地花飛四月天離魂銷別浦斷靄暗前川美
政酬明主芳聲茂昔賢商山無吏隱清暇抱琴眠

晚發萊城

羸馬策新秋清光自可遊殘霞依古木野水艤孤舟人
跡新沙潤蟬聲落日道征鞍何處息沽酒便淹留

次韻南莊

一心無俗物滿眼是春光楊柳孤村靜烟花曲徑芳看
山同野鹿藉草當胡牀回首紅塵裏無如此地狂

重陽

佳節際重陽西風野日黃鳴鴻雲外度細菊目前香遣
興詩從拙衝愁酒放狂獨醒還獨醉塵俗默低昂

次韻雪聲

片片落來輕幽聽細細鳴撲紗燈影靜瀉竹夜深清夢
破黃蘆鴈愁添紫塞兵何堪擊鷺鷥蔡下不分明

次韻雪色

窮陰凝皓潔青女未依稀越犬風前吠梁園月下歸疎
梅迷玉魄孤鶴失仙衣粹質誰能奪緇塵迴自違

野鶴

野鶴集沙渚悠悠向曉陽長鳴寒野濶振翼海天茫仙

格違塵俗閒身足稻梁好隨王子去已與衛軒忘

無題

秦箏聲琅琅越女歌遶梁響劇傾衆耳曲終斷人腸高
情五陵客醲賞一朝償古音豈不雅寂然貯錦囊

冬月感懷

窓月明如練松風輕入簷不成清夜寐相對燭花殘往
事翻新恨周年損故顏餘齡春酒在何必問還丹

招蜂

何處黃蜂集招來野叟家鑿苔仍歲計掇葢閱年華
努力知誰利依人正爾嗟君臣負明識何事戀塵譁

乙丑正月二日慎脩北赴禮闈十一日大雪懷

思

兒作燕山別親留溟海情北風吹大雪何處駐行旌
春入瓊林早雲開玉殿明望遙天漸邇計日慰佳聲

用韻寄答萊城張南溪老長府舊友

相思分異地相應自同聲各抱懸懸意頻看字字情餘

年知幾許何日續重盟南北應天限離鴻怨弟兄

五言排律

曉霽

五仄
五平

細雨夜漸歇侵朝雲初晴竹檻宿靄散松堦餘寒清旭
日野鶴奮輕烟林鴈鳴遠巘潤畫碧新榮鮮圖程亂蘚
疊紫翠平池搖空明啓牖爽氣溢開簾微風生俯仰盡
勝覽徘徊多高情作賦謝妙思橫琴鳴佳聲撫翫興未
已蕭然偕誰賡

煎茶 都城作

斧冰寒泉下粉玉石瓶中鳳團沈夜寂獸炭燒春紅霜
清上桂魄人靜騷松風芳香渙瑞靄靈味湍華鐘孤坐
寒不寐一飲清無窮枯腸潤仙液輕汗回春融興逸崑
崙外神爽桃源叢可以發清詠兼之韻枯桐長嘯仰蒼
昊矯首聽高鴻壯心逐雲翮奮翼來天東

西莊晚歸十韻

褰帷一東望溟海正蒼然浪激潮頭雪山涵浦外烟蓬

瀛迷落日蛟蜃幻長川孤鳥飛還沒歸雲暗欲連偶來
逸清興勝覽脫塵緣景入仙源晚神遊霞際天短柯情
自在一葦夢相牽慨古超塵外嗟今老目前不成黃鶴
客深愧綵毫篇片片輕鷗下悠悠祇對眠

中秋對月小飲十韻

寂寂蒼虛濶明明皓魄來清風下黃葉白露濕青苔聽
竹幽懷靜掃花逸興開霜前驚雁度歲暮感蛩哀桐影
侵瑤席鐘聲度玉臺賞心仍獨坐對影暫相陪把酒吞

星冷浮生怯電催
高歌謝塵慮
清詠愧非才
老矣休林際
蕭然醉海隈
百年寡知己
蚌守竟凡埃

代高時齋節推賀平渡李兩山太守八袞有三
二十韻

渺渺雲龍裔
悠悠蓬島春
精英集海岱
劍舄出風塵
襟抱乾坤外
風流泗水濱
淳還高邃古
玄養裕天真
芝采今來漢
桃花久避秦
朝廷須鶴髮
俎豆瀆鴻賓
晉楚聲光迴
山川雨露均
功成從絕粒
冠挂學全身
幽谷虛千

載長林觀一人雲霞韜古洞麋鹿老比隣丹鼎追瑤鬼
清波跨紫鱗再週新甲子七守舊庚申耄協姜侯返齡
超錢老倫滄洲娛蔗境青鳥迂芳辰道氣通無極家聲
演至仁芳流丹桂遠秀吐玉蘭新秋錦誇三捷春雷奮
一伸優閒一國老模範四朝臣竊幸紫闕客會依青海
津擬將冥造破遙祝老人頻

悼世皇三十韻

聖帝今何在皇恩不可酬康平叨四紀德業慰千秋刑

賞天王政奸諛遐邇休神功昭絕域靈瑞輯中州尺土
一心澤秋毫萬里眸唐虞軼高志秦漢眇凡儔千古英
雄主羣生際會優一朝三世祿兩誥五雲浮羅織曾生
死權豪已破謀晉慙天日末歸乞隴雲遊白面新承寵
金門早見收天波春溢海晚眷雪盈頭終自懷芹曝無
由報馬牛夙期天保佑不為鼎湖留龍劍空陳迹烏號
遺世憂天風悲海岳雲日慘旌旂山色悽還變江聲咽
不流麻衣飛暮雪杜宇劇春愁賓旅辭華館絃歌靜玉

樓鳳膏寒貝闕孔蓋杳瀛洲仙骨一區木神龍數尺丘
忠肝悽欲裂苦節竟何求夏啟歸賢嗣周成佐故侯兒
曹貞信義王業勉伊周壯士應崇孝殘軀不解籌徒將
庭教意不盡此生謀力竭懷終古哀餘抱寸幽龍顏瞻
失覩天關負無由悵望蒼梧老啼痕湘水侔山川兩不
滅此恨共悠悠

海壑吟稿卷二

欽定四庫全書

集部
海壑吟稿卷三

詳校官檢討_臣劉所

侍讀_臣孫球覆勘

總校官編修_臣倉聖脉

校對官學正_臣翁樹棠

謄錄監生_臣王 官

欽定四庫全書

海壑吟稿卷三

明 趙完璧 撰

七言律詩 上

曉眠

枕畔鳴鷄是幾迴，不聞禁鼓塞笳催。

曾宦遊都城
隴西故云

陶然

人集彤庭後，嗒爾日高滄海隈。門掩松堦昨夜雪，濤翻
茶竈午時雷。朱簾不捲沉清影，莫放閒雲擾夢來。

壬申夏日赴西莊

南薰吹醒市塵愁冉冉新涼六月秋夾岸綠楊蟬不息
連村青靄雨初收巾車迤邐蒼葭渚藜杖逍遙白鷺洲
一片野心何所繫野花啼鳥共優游

鹽城官舍暮雨感懷

暮雨霏霏動客懷宿雲靄靄伴空齋無端冷氣生虛壁
不盡寒聲下綠槐故識夢中揮玉塵舞衣海上溜金釵
清風自笑無飛翼滿眼烟波奈楚淮

嘉靖丙寅八月十日祝萬壽

聖主仙齡甲子週西風吹喜溢中州赤天星彩光宸極
瓊島烟波度海籌萬國衣冠朝紫府五雲幽冀仰丹丘
軒黃身世全無補天保高歌舞未休

即景

八月淮海客孤城高齋暮景何如情孤鴻落日天邊去
雙杵秋風月下鳴滿地花飛紅雪冷一庭竹合翠雲平
禁他離思沉酣睡奈爾寒蛩日夜聲

鹽署不寐

樓頭鶴鼓四更過枕上蝶飛不到家
風透紫綃涼若水
露濃催織靜生譁
詩因苦思聽殘漏
燈為無眠數落花
夜夜竹窗緣底事
碧雲看盡楚天涯

懷月林

坐杳音塵是幾年
思荃心事自懸懸
天涯鴻鴈秋將老
江上青山日對眠
夢斷故人蓬海月
杯停新恨菊花天
淮南久負白雲約
去住幽情各黯然

丁卯鹽城元日

喜收雨雪自經旬
侵曉晴光逐歲新
大造有知開景象
萬方無地不陽春
日長詩酒清淮客
風暖絃歌太古民
垂老唐虞何以報
年年庭教漢良臣

鹽署凭高晚望

北望滄茫眼欲迷
碧峯斜日晚悽悽
烟光度鳥白還沒
水色連天青更低
千里秋顏吾已老
萬山雲樹思堪題
曾耽麴蘖滄江外
不醉闌干玉署西

小僮綴磁片代簷鐵風中琅然可聽

畫簷飛度玉丁東雜佩仙人緩步空黯黯楚臺隨暮雨
迢迢銀浦下秋風無情苦為多情擾動處生憎靜處逢
一夜不成千里夢轉看殘月向朦朧

送溫玉齋三尹擢典魯藩

一杖清秋且未歸錦帆先送楚雲飛高風曠世驚青眼
落日遙岑隔翠微江國有情人去後客懷無計鴈來稀
王門久負雲和曲此日淮南正可依

秋日署閒即事

玉署高風鎮日清
開簾滿院綠苔明
憑軒聽鶴鳴晴圃
倚杖看雲過古城
翠徑幽花留晚色
粉牆脩竹撼秋聲
居閒不染塵埃迹
同調山翁匿姓名

鹽署聞丘月林擢赴南太常舟過寶應遣送

聞道飛帆楚水秋
碧雲深署奈羈愁
參差鴻鴈違青眼
咫尺烟波滯白頭
八月仙槎天上客
十年情思海邊樓
青燈莫慰江湖夜
新墨淋漓送綵舟

次韻鹽城月下聞笛

羌管誰家弄月明晚風清度隔雲聲悠悠夜館渾無賴
裊裊江天別有情楊柳淒涼鄉夢斷梅花零落鬢絲盈
闌干十二醒殘酒憔悴年年客楚城

次韻水中花影

穠花瀕渌興悠哉晴澣佳期心眼開帝子綵雲歸極浦
影娥明月下瑤臺綺羅錦水經秋澣紅翠青銅向曉回
自是馮夷宮裏勝玉欄長倚碧烟隈

鹽城秋夜覺後聽雨

分明寃夢到家來，却被閒窗細雨催。
栩栩千山隨意去，匆匆一榻故飛回。
懸泉不澣羈愁惡，長夜難將曙色開。
心火不隨爐燼滅，倚聽寒鼓下樓臺。

鹽城歸遷舊居登樓偶成

白髮朱欄快一凭，珠山南跨枕滄溟。
烟中浩漫連天浸，雲際崢嶸拈地青。
千古畫圖詩興濶，四時風月醉魂醒。
蓬瀛不用飛翰去，坐嘯青雲送暮齡。

春遊迴文

忙裏閒情娛景華
度溪尋壑驀晴沙
長原翠漾雲浮草
暖徑紅飛燕落花
狂詠客亭春把酒
憩留僧寺晚烹茶
香生陌霧飄風軟
蒼莽踏來遊路遐

夏日迴文

紅榴石畔海光晴
寂寂閒堦曉翫清
風靜柳亭凝靄細
日曛荷沼映霞明
桐青坐暇休炎暑
草碧眠慵廢讀耕
空院小吟長晝靜
同誰興飲聽啼鶯

秋懷迴文

寒烟淡點亂山青
眺遠傷懷老渤溟
湍急落聲風拂樹
鴈飛涵影淥開萍
榦侵冷月宵吟苦
壁訴哀蛩暮酒醒
殘調古琴橫竹石
蘭芳歎寂佇孤亭

冬曉迴文

紅日初醒睡起遲
捲簾朱戶暖烟披
鴻飛目斷雲山遠
鶴伴人閒曉枕欹
松雪覆堦清入畫
竹風鳴院靜吟詩
東窻爛影移霞綵
蓬髮短歌酣酒卮

漫興

弄罷素琴看鶴舞歌殘空谷聽鶯啼蒼苔細數閒花落
白晝清眠春草萋雲去雲來滄海上日生日落翠屏西
悠悠野鹿乾坤老垂白無心更釣溪

冬夜

撥火青宵聽煮茶蘭燈燒落玉蟲花月明當戶清如晝
霜氣凝庭靜不譁凍折冰絃驚睡鶴寒生風樹起啼鴉
幽人不盡松窻興坐送清陰下碧紗

煮茶聲

石鼎春茸靜自烹寒泉暖焰戰分明山蟬泣露秋仍細
松葉吟風晚更清不雜塵譁隨斷靄偶醒殘酒傍孤檠
芳聲不為朱門沸獨聽幽軒慰野情

霜月

玉魄鉛花晚逐飛素娥青女夜忘歸窺簾暗迫肌生粟
到地明看星射輝竊藥路茫蟬鬢老拊膺人去蚌珠依
龍墀如水瑤堦滑爭似烟光臥掩扉

送劉春臺太守朝京

朝天旌節海邊來，殘雪荒亭送玉杯。
風樹有情絃管外，鶯花如夢水雲隈。
翠麟烟靄瞻堯日，丹扆勲名陋漢才。
鵬鷃不堪林石思，旋將霖雨過蓬萊。

壬戌秋夜聞雨不寐憶亡弟介泉

枯竹窻前雨未闌，離鴻聲斷夜生寒。
哀蛩切切金爐燼，銀燭淒淒玉漏殘。
風樹不休人不寐，池塘無夢恨無端。
聯牀更作來生約，慙愧鵲鴒淚暗彈。

芍藥

一枝紅藥紫峯前半出青叢露未乾脂粉不緣粧鏡曉
塵凡適偶玉臺寒芳姿苦惜忘斑鬢清賞長將倚畫欄
錦瑟無聲終日醉黃昏猶約隔年看

次韻玉泉

驚飛神錫翠岩開瀉出瓊珠渙不回風帶潮聲千澗落
雪翻寒色一時來清流人逸娛高枕淍影龍歸撼上台
一脉九天輸萬古滄波未必更塵埃

簷前鳴玉

碧雲初斂畫簷空何處飛瓊向晚風破靄聲疎寒寂寂
步虛人過夜匆匆燒殘銀燭寐不得滴盡銅壺興未窮
清影依稀珠箔外二三竿竹月明中

曉鐘

曉鐘不異夜來鳴昏曉相催合自驚曙色微茫分宿靄
年光斷送向殘更長鯨殷起風塵思短髮徐添雪刺明
老懶無妨停午卧匆匆莫悞鳳樓聲

代人送同年推刑泉州

風雲萬里覲仙才何事春深白鷁開
瀛沼鳳鸞今在簡
炎荒雀鼠會看推馬蹄曉送黃梅雨
羊角秋生翠栢臺
官柳斜暉無可贈民情此日正堪哀

冬日過雙塔僧寺

漠漠風霾白日黃浮屠繫馬暮清光
畫廊烟靜魚聲歇
寶塔雲中鐵韻長雙鬢塵凝憐俗狀
滿懷機擾斷愁腸
衰年苦為微官縛白社風流詎可忘

都城冬夜不寐感懷

雪霽清宵迥未明宮城漏結斷寒更鳴風窻紙驚殘夢
如水衾稠冷宦情三徑已荒人未去尺書久滯鴈無聲
衰年猶自甘勤動升斗如何不解輕

都城西香山寺

獨宿香山正寂寥憑誰詩酒縱良宵檻前山色千年畫
枕上泉聲半夜潮風雨滿天劇愁思乾坤無地作逍遙
翠微夢破紅塵去清景曾教負聖朝

乙卯九月七日西城聞慎修秋捷

齊川秋捷迅燕山青妙功名慰鬢斑何益父書標錦奪
早繩祖武桂香攀五雲喜溢蓬瀛外一日光生海岱間
聖代世恩深雨露馬牛無補汗衰顏

咸陽懷古

悲風淅淅古咸陽百代遺蹤自可傷王氣有歸弓劍沒
寢園無祀野雲涼蒿萊滿眼英雄去翁仲含情歲月長
索寞秋原那可問碧峯斜日向蒼蒼

會寧縣旅夜簡吳檜皋太守堂翁

薄衾寒夜卧如弓萬種羈愁輾轉中有慰月輪來海上
無書鴻鴈過天東百年身計老仍拙萬里歸程夢轉空
落葉滿窻人不寐坐令銷瘦愧無功

南山曉歸

苦愛雲山風景幽百年心事幾曾休是誰於此長相絕
顧我而今不自由翠巘有情遙送客蒼烟驅馬重回頭
塵羅卒抱崆峒恨多少浮榮多少愁

丁酉省試畢曉歸東省

颼颼西風已老秋
海東歸騎曉悠悠
荒亭落木蕭蕭下
古渡寒烟冉冉收
董賈萬言珍楚璞
燕齊三戰逞吳鉤
壯圖早晚青雲上
折取天香慰白頭

瀕溪曉行

玉驄策曉傍寒流水
自悠悠
春又秋
蠡岸颼風翻木葉
蒼葭棲靄暗汀洲
波間魚逐真相樂
沙上鷗眠不解愁
漁艇釣磯無限恨
塵勞何事不相謀

夏日同張蕙江太守海遊得海字即席偶成

桂棹蘭橈泛滄海微薰晴日萃僚寀澄波萬里碧泓澗
遙山幾點青蟲鬼笙簫嚶嚶醉醪醺烟靄迢迢聽欸乃
回首風塵萬事忘臨江橫槩今安在

再過金山未得登覽舟中望而有作

兩過金山登未得風塵空復抱高情乾坤勝槩還千古
詩酒無緣負此生心逐白雲環巘嶠棹隨流水趣江程
營魂未慰緣何事挂帶山門愧昔盟

春日淮安道中

春日遲遲古道賒東風遊子倦塵沙方塘水暖鴛鴦睡
平浦烟消鴻鴈斜滿眼青山非故國一鞭羸馬去誰家
賦詩飲酒天涯興莫遣離愁老歲華

哭水南翁

吁嗟冥漠太夢夢喪我通家鶴髮翁高世才華先子畏
忘年交誼古人風他鄉風雨愁相慰故里觴詩老更同
渺渺斷魂何所仰淒涼淚落水雲東

妓者失明

合惜秋波不可醫芳心不滅欲何為綺窻曉日迷青鏡
金谷春風謝紫卮絕望遠山空舊恨傳情無地罷新知
琵琶記得從前譜一曲嬌歌淚暗垂

謝呂乾齋僉憲故人見過

蒼唐草樹慘高秋海上民風殊可憂赤縣恩光宣魏闕
碧烟旌旆達瀛洲九霄鸞鳳欣青眼十載江山盡白頭
豈有芳聲駐車馬故人雅意自綢繆

木魚聲

僧魚聲度晚烟青
索寞松廊徙倚聽
緩急自隨仙梵落
迢遙已覺睡魔醒
風前暗點愁城破
月下從教慾海惺
清味空門今不厭
禪關何處好傳經

九月庭下杏花

寒露淒淒肅曉旻
嗟渠何事再榮新
西風化擬東風早
落葉枝同未葉春
歸燕尚懷寒食約
黃花曠值晚秋晨
當陽慶際重華聖
合有調元此細論

上程碧溪太守

守名世鵬廣東人

萬里雄圖仰德光扶搖東徙慰窮荒精忠翊聖風雲迴
枯槁回春雨露香一變曠聞周禮教千年喜覩漢循良
清時赤子今何幸白髮丹心世未忘

己酉下第

青門淚落海雲飛青紫曾看拾芥微五十文章猶錦字
三千勝負有玄機朱衣棄我孤豚細翠岱嗤人匹馬歸
却喜諸郎盡英妙巍科應復慰重輝

次韻顧文昱公白鴈

紫塞脩脩素作儀
關城寒早帶霜飛
湖天曠失雲中影
漢水長迷月下輝
瑞葉九天曾拂羽
荻花何處旋為衣
上林玉訝回陽侶
擬自蘓卿雪裏歸

李亨菴見枉因示佳製用韻感賦

小洞傳呼啟碧蘿
逢迎無奈竹婆娑
山樽有興花為妓
檀板無聲鳥作歌
宦海冠裳萍梗跡
浮生日月玉人梭
寇公此日真難借
白首相酬莫厭多

送李亨菴太守擢貳河間二首

赤夏辭東何處遊
五雲直北是瀛洲
華胥夢破孤城月
玄朔情違一葉舟
白雪俄驚調滄海
綵毫無計侍清秋
幽岩莫逆佳期在
早晚霜臺慰別愁

翠靄銀塘紅蓼花
玉人青鏡送仙槎
山光悵別孤雲暮
帆影關情落照斜
五馬春歸漳水際
孤鴻秋斷海天涯
何郎無奈瓜期早
坐遣清風去思賒

王冠峯見招觀蓮阻雨簡復

正憶仙芝豔豔開報書忽下紫鸞催纔驅羸馬西溪度
旋逐狂風北雨來絕代妍華勞遠夢片時歡賞阻英才
橫塘十里烟雲冷自昔佳人不易諧

次韻賞蓮

芳姿裊裊出晴波烟破虛明照影娥紫豔生香風自遠
紅酣吐暈日偏多盈盈帝子來湘浦脉脉天孫隔絳河
莫謂無情情亦在休教解語動清歌

秋夜聽雨小飲二首

坐聽微雨夜如何小飲秋堂樂意多
臉上酡顏忘白髮
杯中燈影晃金波
高臺魏女空揮淚
片石羊公久自磨
今古滔滔春浪湧
一迴長歎一高歌

莫教煩惱心常累
曾悟空門水不波
萬古此生真可惜
百杯良夜豈為多
逐臣自笑山林僻
幽室還宜風雨過
縱酒放歌今不樂
寒蛩昏曉欲如何

沙川東望

小橋東畔過沙洲
一望清光雨乍收
雲矗山腰橫玉帶

水環屋角遠蒼虬磯邊楊柳堪垂釣天外滄浪好放舟
鄉土有情風景勝白頭心事共誰籌

詠孤鴈

曳曳孤飛何處來嗷嗷四顧不勝哀
虞羅駭失遙難合烟浦冥迷渙不回
故侶有情天遠大斷雲無賴日徘徊
長鳴帶月秋江上影落寒波祗獨猜

送慎修兒還任兵曹

好去神京奉聖王休隨兒女戀高堂
雙藜斜日猶強健

百畝終年足稻梁有寵自天皆雨露無能報國祇純良
兵權繆與期前美老擬營丘樂未央

送江龍所通府署州西還

荒城歲晚事多違無奈悲風送客歸鴻鴈數聲留遠思
海山千里尚餘輝春觴漫酌聊相贈冬日遄飛不可依
霖雨無私更何地東人空有淚沾衣

次韻壬申元日大雪

纔看青鳥啟芳辰滕六飛花爛目新帶雨無聲潛入夜

裁冰不解暗生春
年登南畝知誰卜
日醉東風樂更真
十四飛鴻促銀燭
不知斗柄轉高旻

趙烈婦

趙董生妻也
董早沒趙隨自經以殉鄉人哀
之余亦感賦

玉委鴻毛何太輕
天常蚤已獨分明
破來蛺蝶人間夢
合去鴛鴦地下情
斑雨恨遺湘竹淚
紫簫淒斷鳳臺聲
誰將銀筆清風下
不為衰顏著令名

癸酉膺封

萬厯新主覃恩老夫婦以慎修兒備員夏郎
叨與殊典鄉人稱慶乃以不肖當年七十有
四老妻六十有九而於先朝又曾各沾一命
白有司區雙壽重封以榮之因而喜賦

蠢愚翁媪眷清朝祇以兒曹媿冒叨鶴髮雙逢千載慶
龍章重下五雲高虛生豈有涓埃補小子曾輸犬馬勞
末路寸衷無地報肯教庭下背伊皋

夏夜

落日逍遙向晚涼
芳庭孤坐興何長
碧虛露下塵寰靜
銀浦雲消仙路茫
兩腋風生飛海嶠
一天星動蕩滄浪
通宵無寐起人境
祇恐曦明墮舊鄉

暮春雨霽感懷

風柔雨霽暮春天
可恨塵寰不了緣
柳色不知城郭外
鳥聲已亂市囂前
桃花野逕雲中騎
絃管湖天鏡裏船
多少風流賞心事
白頭擾擾是何年

冬夜聞逢迎鼓角

寒夜三更鼓角鳴遙知下吏苦逢迎冰霜透骨微名縛
軒冕凌人四體輕枯柳門間無限趣紫芝山靜有餘清
衡茅真自高風在楫拙煨爐睡到明

次韻秋日書懷二首簡紀湛泉

機頭鸚鵡斬千鈞芰製曾教污紫塵掇得薜蘿輕斗粟
步來谿壑謝蒲輪不才白髮違明主多病滄浪縱逐臣
忙裏琴書醒後酒秋風瀟灑自由身

歎老驚秋倚畫屏
搏沙功業竟何成
心勞刻葉終無補
技擅屠龍豈令名
撫劍停杯不自醉
橫琴弔古為誰鳴
兒曹別有岩廊業
林壑清風且讀耕

詠漁

萬頃滄波恣所如
水雲清曠豈忘渠
長烟鷗鷺情偏洽
細雨蒹葭興有餘
幾日醉來村舍酒
一生飽足釣船魚
湖天縹渺無相識
一笛幽襟月下紓

詠樵

翠巘千尋斧白雲高風杳不染塵氛襟裾每帶烟光潤
毛骨常從蘭氣薰松下看棋迷甲子夜中煮石待燒焚
山深歲老韜名姓一笑那知麋鹿羣

詠耕

一犁沉跡野雲邊百畝蕭然桑柘烟憺意杏花春雨後
浩歌金石晚風前飯抄雲子終年厭酒盡霞觴對月眠
鼓腹豈云非帝力明良應慰老林泉

詠牧

野趣閒情一跨牛
烟簑雨笠此生謀
挂書旭日桃花塢
叩角秋風蘆荻洲
笛裏關山今古恨
笑中榛莽貴豪休
斜陽古道頻回首
多少英雄名利愁

用韻寄答東萊張南溪老長府舊友

二十餘年久別來
丘林衰老愧仙才
觴詩即景心猶壯
松菊怡情手自栽
青眼故人常在夢
白頭心事已成灰
詩來慰我情如結
舊恨新愁不易裁

鹽城初夏官舍獨坐

幽軒晴晝上瓊鉤長夏清光寂寞儔竹影恣狂風裊裊
楊花隨意日悠悠短牆蝴蝶移春去獨樹黃鸝只暫留
惟有海雲推不散欺人白日到牀頭

夷齊廟

二賢千載尚餘休古廟荒涼過客留秋圃空聞寒鴈度
棠梨惟見野蜂遊拾薇谿壑孤忠老棄國烟霞百世謀
一掃寒蕪倍惆悵可堪聾聵更遺羞

春日旅中

春日融融雪漸消
客懷鬱鬱思無聊
虛庭風細松聲落
薄海雲開鴈影遙
書劒可堪淹歲月
樓臺何處厭笙簫
朱簾不動爐烟細
一曲絲桐慰寂寥

次韻春日匡氏西堂二首

沙暄遲日暮山堂
拽杖東風踏莽蒼
野鳥隔林清弄味
桃花流水暗生香
閒依脩竹頻攜酒
靜愛孤雲獨據牀
潦倒揮毫渾漫興
高名真自媿王楊

野塘鷗鷺靜比鄰
何用藏犀此避塵
芳草緩尋違俗物

落花沉醉作閒人
溪頭綠浪無歸日
柳外晴絲不繫春
白眼裏中誰是伴
青山海上一佳賓

海壑吟稿卷三